



Տ. ԱՐՇԱԿ ԵՊԻՍԿՈՊՈՍ ԽԱՉԱՏՐՅԱՆԻ ՔԱՐՈԾԸ՝ ԽՈՍՎԱԾ ԽԱՉՎԵՐԱՅԻ ՏՈՆԻՆ

(13 սեպտեմբերի, 2020 թ.)

«Եւ որ ոչ առնու զխաչ իւր եւ գայ զկնի իմ,
չէ ինձ արժանի»

(Մատթ. Ժ. 38):

Սիրելի՛ քույրեր եւ եղբայրներ,

Հոգու ջերմ զգացումներով ողջունում եմ ձեզ եւ շնորհավորում Սուրբ Խաչի Վերացման տոնի առիթով: Մեր ժողովուրդը, որ իր կյանքի ու արյան վկայությամբ ոռոգել ու ծաղկեցրել է Տիրոջ խաչափայտը, առանձնակի ոգեւորությամբ ու ներշնչումով է տոնախմբում Խաչվերացի հիշատակը: Սա պատմական իրադարձություն է, որի արմատները ձգվում են դեպի դարերի խորքը, մինչեւ է. դար, երբ Տիրոջ խաչափայտը զինվորյալ քրիստոնյաների սխրանքով փրկվեց ալլակրոնների գերեվարումից:

Նյութապաշտ աշխարհում դժվար է հասկանալ Սուրբ Խաչի՝ իրականում անփոխարինելի այդ սրբության համար քրիստոնյաների վճարած զոհողությունների ու զրկանքների իմաստը: Նյութակենտրոն աշխարհում մարդկային պատկերացումները, վարքագիծն ու հարաբերությունները, վերջին հաշվով՝ նաեւ պետությունների քաղաքականությունները կառուցվում են առօրեական հաշվենկատությամբ՝ ուղղված այլոց նկատմամբ առավելության հաստատմանը, ազդեցության ընդլայնմանը եւ կամ աշխարհաքաղաքական հավակնությունների բավարարմանը: Մինչդեռ քրիստոնյայի համար Խաչն է իմաստն ու նպատակը կյանքի, որն անբաժանելիորեն միացած է անմահ Խաչալին՝ մեր Տեր Հիսուս Քրիստոսին: Եւ ուրեմն՝ լինել Քրիստոսի հետեւորդ նշանակում է լինել Խաչի ուխտավոր:

Աստված Ինքն անցավ խաչի ճանապարհը, որ նույն է թե՛ աստվածային ծրագրի իրագործման համար կրեց զրկանքներ ու տառապանքներ, անցավ չարչարանաց ու մահվան ճանապարհը: Խաչի խորհուրդը՝

բնական թե հարուցված խոչընդոտների, գիտակցված զոհողությունների ու զրկանքների միջոցով փրկության ու հաղթանակի հասնելու խորհուրդն է: Այսպես հարություն առավ մեր Տերը՝ Հիսուս Քրիստոս՝ դիմակայելով ու հաղթահարելով փորձություններն ու հալածանքները, իսպառ մերժելով բոլոր գայթակղությունները: Այս ամենով հանդերձ՝ Քրիստոս հավատարիմ եղավ ու մնաց իր առաքելությանը նույնիսկ ճակատագրականորեն ծանրագույն պահերին, երբ, կարծես թե, անգամ Աստված էր լքել Նրան: Նրա համախոհներն ու հետեւորդները, որոնք փայլում էին հավատարմության ու անդավաճան նվիրումի հավաստիացումներով ու ճամարտակություններով, վայրկենաբար ուրացան ու լքեցին Նրան՝ առաջին իսկ փորձության պահին: Ժողովուրդը, որ ցնծությամբ ու փառաբանական աղաղակներով էր ազդարարում Երուսաղեմ Նրա մուտքը, օրեր անց ընդամենը լուռ ու անտարբեր ականատեսը եւ անզգացմունք վկան դարձավ Նրա խաչելությանն ու մահվանը: Ահա սա է ճանապարհը խաչի՝ հանձն առնել զրկանքներ ու տառապանքներ, մինչեւ անգամ մահ եւ շնահանջել ու չլքել առաքելությունը, եթե անգամ լքել է քեզ վերջին համախոհը:

Այսպիսին եղավ Քրիստոսի խաչի ճանապարհը՝ Նրա կյանքն ու առաքելությունը: Իրավ է ասված՝ յուրաքանչյուրը վճարում է իր ընտրության համար: Քրիստոս Ինքը կատարեց ընտրությունը խաչի ճանապարհի եւ դրա համար հատուցեց իր կյանքով, ինչպես Սուրբ Գիրքը կասեր, «խմեց դառնության բաժակը մինչեւ վերջ» (հմմտ. Մատթ. Ի. 22): Վճարեց, որովհետեւ համոզված էր իր առաքելության աստվածայնության, իր նպատակի բյուրեղայնության մեջ: Տիրոջ վճարած արյան շնորհով մենք ստացանք փրկություն: Ավելի, քան որեւէ խոսք՝ Տիրոջ չարչարանքն ու մահն են անսուտ վկայությունը Նրա առաքելության ճշմարտության: Եւ այս համոզումն է ոգեշնչում մարդկանց դառնալու հետեւորդը Քրիստոսի եւ ուխտավորը խաչի: Ցանկանում ես լծակիցներ ու համախոհներ ունենալ առաքելությանդ ու գաղափարիդ, ուրեմն դու առաջինը դարձիր ջահակիրն ու նահատակը դրա: Պատրաստ եղիր մահվամբ հատուցել, քան թե մի նշանախեց անգամ նահանջել: Սա է ճանապարհը խաչի, որ պսակվում է հարությամբ ու հաղթանակով:

Սիրելի՛ քույրեր եւ եղբայրներ, այսօր այդ առաքելության ճանապարհին իրենց առաջին քայլերը կատարեցին մեր Սուրբ Եկեղեցու չորս նվիրյալ զինվորներ՝ Վարազդատ, Ատոմ, Վահան, Նարեկ սարկավազները,

որոնք իրենց հոգիները, մտքերն ու մարմինները որպես ընծա ուխտեցին մատուցել խաչյալ Տիրոջը: Նրանք ուխտեցին դառնալ խաչակիրներ եւ իսաչի ճանապարհի ուխտավորներ:

Ճանաչում ենք նրանց ճեմարանական ուսումնառության տարիներից, երբ հոգեւոր կյանքի դարբնոցում սնուցվում էր նրանց հոգին, կոփվում կամբը, եւ հարստանում միտքը:

Սիրելի՛ նորընծաներ, ամբողջ սրտով ուրախ եմ ձեր լծակցության համար, մեծ է պատիվը եւ աննկարագրելի պատասխանատվությունը դառնալու ճանապարհորդակիցները Քրիստոսի: Հնարավոր է արդյոք երեւակայել, որ Աստված մեզ՝ այսօրվա հոգեւորականներին, շնորհ է պարգեւել դառնալու ուղիղ ժառանգորդը լուսամիտ ու սրբակենցաղ՝ հռչակավոր հոգեւոր մեր հայրերի՝ Լուսավորիչ, Սահակ Պարթեւ ու Շնորհալի Հայրապետների, կրելու նույն տիտղոսն ու աստիճանը, ինչ Մաշտոց ու Նարեկացի աստվածախոս վարդապետները:

Սիրելի՛ եղբայրներ, այս ամբողջ պատվի ու պատասխանատվության մեջ դյուրին ճանապարհ չէ սպասվում ձեզ: Քիչ չեն այցելելու ձեզ հուսախաբությունները, միշտ չէ որ մեծարանքով պիտի ընդունեն ձեզ եւ գովասանքով արտահայտվեն ձեր մասին: Ոմանց համար դուք լինելու եք միջնադարյան խավարամտության ու հնաոճության ժամանակավրեպ քարոզիչներ, ուրիշների համար տաղտկալի ու զավեշտական են թվալու կյանքի ու մահվան, փրկության ու հավիտենական կյանքի մասին ձեր մտորումներն ու քարոզները:

Քրիստոսին հետեւելու, իսաչի ճանապարհի ուխտավոր լինելու՝ ձեր հավատքի ու համոզումների, հոգեւոր, բարոյական ու ազգային սրբությունների պաշտպանության ու քարոզության համար կլինի, որ կհատուցեք ձեր առողջությամբ ու բարեկեցությամբ: Կյանքում առաջացող բնական ու հարուցված խոչընդոտներն ու զրկանքները հաճախ դուք կկրեք խոր միայնության մեջ՝ միակ, բայց եւ անփոխարինելի սփոփանք գտնելով Աստծու հետ զրույցներում: Եւ այս է Աստծու հանդեպ հավատքն ու հավատարմությունը, մխիթարության մեր աղբյուրը: Այդ հավատքն է ուժ ու զորություն պարգեւում հոգեւորականներին: Մեր պատասխանատվությունն անվրեպ աճում է այն գիտակցությամբ, որ մենք պահապաններն ենք Տիրոջից ժառանգություն ստացած Հայոց հոգեւոր ամրոցի: Մարգարեի խոսքի համաձայն՝ «դետ ենք կարգված Աստծո ժողովրդի մեջ» (հմմտ. Եզեկ. Գ. 17):

Միրելի՛ նորընծաներ, Հայոց այդ հոգեւոր ամրոցի, սրբազան մեր հայրենիքի հիշատակները կրկին-վերստին ձեր հոգիներում անջնջելիորեն դրոշմելու համար մենք հայկաշունչ նոր անուններով կոչեցինք ձեզ: Ձեզ անվանադրեցինք Տեր Հայկ, Տեր Հայասա, Տեր Հայկազուն եւ Տեր Արամ, որպեսզի միշտ հիշեք Ձեր պարտքը ձեզ ծնած ու սնած ժողովրդի հանդեպ, միշտ հիշեք հայոց հոգեւոր ու ազգային ինքնության պաշտպանության, պահպանության ու զորացման մեջ ձեր բացառիկ կոչման ու պատասխանատվության մասին:

Միրելի՛ եղբայրներ, հին Արեւելքում հավատում էին, որ ամեն նորածնի հետ երկնքում նոր աստղ է ավելանում: Պայծառ պահեք երկնքում ձեր աստղը եւ լույս ավելացրեք մեր ժողովրդի ճանապարհին, եւ թող Աստված օրհնի ձեր առաքելությունը եւ անկասելի դարձնի առ Տիրոջ Սուրբ Խաչը ձեր ուխտագնացությունը:

Տիրոջ օրհնությունն ու զորակցությունը Ձեզ՝ ուխտի մեջ հաստատուն, հավատքի մեջ անսասան եւ նվիրումի մեջ աննվազ մնալու համար:

Որդիական մեր խոնարհումի հետ այս պահին մեր ջերմագին շնորհավորանքներն ու բարեմաղթանքներն ենք բերում ազգիս Հայրապետին՝ Ն. Ս. Օ. Տ. Տ. Գարեգին Երկրորդ Ամենայն Հայոց Կաթողիկոսին, մաղթելով արդյունավոր գահակալության երկար տարիներ:

Վեհափա՛ռ Տեր, թող Ձեր հոգեւոր խնամքի ներքո նվիրյալ նոր մշակներ հասակ առնեն ու հերկեն անդաստանները մեր Սուրբ Եկեղեցու:

Շնորհավորանքներս մեր եկեղեցականաց ողջ դասին՝ մայրավանքում եւ այլուր սպասավորող մեր նվիրյալ բոլոր եղբայրներին՝ մեզ լծակից նոր եղբայրներով հարստանալու համար:

Տիրոջ շնորհը, սերը եւ ողորմությունը մեր ողջ ժողովրդին ու ամենքիս հետ, ամեն:

